

析疑指迷論序

神峰逍遙大師出示高論二編名曰析疑指迷清談不吝於胸懷奧妙發揮於翰墨平生所養於茲見矣幸緣一覽俾予泠泠然獨立於通衢不知四肢之有無則可以墻塹玄門梯航後學者大德戊戌仲春朔汝南重玄子劉道真謹跋

前火傳後火薪異而焰同今聖嗣古聖時殊而道一故宜乎馬譚劉丘已來演玄風敷妙化之真人繼繼而出也神峰逍遙先生牛君鍊師新出奇論二卷目曰析疑指迷屬余以文開卷一閱不覺身世兩忘若馭清飈而遊乎碧落矣其誘人也循循然有條而不紊使人感志頓消而朗徹其進人也端語一發使人

道藏輯要

析疑指迷論

一奎集四

浩然長往而不留其言簡其理微其示教也深其用心也切此可謂火傳而聖繼者也門人恐其微言將沒哀而錄之以裨後進其弘師之道如是此亦可謂用心之厚者焉時大德三年中秋前三日靜安沖漠道人王道亨書

神峰逍遙子閑居幽室倚軒塊坐隱几忘懷適有悟真子李志恒從座而起恭然而立携賸作禮拜而謂曰敢問全真妙理至道精微性命之義修行次序願師演而析疑矣逍遙子答曰夫至道精微無形無名難演難言非容取捨而可得也故心因焉而不能知口辟焉而不能辭在人虛府自悟耳其人叩之不已志之愈誠由是不得已而應命輒述是論名曰析疑指迷庶資

初學之漸悟耳時元貞二年孟春上元日題

析疑指迷論

析疑

或問曰何謂全真答曰卽爾之一念未萌之前也夫一念未萌等同太虛視之不見其色聽之不聞其聲搏之不得其形其上無蓋其下無底其傍無門其正無體其大無外其小無內杳冥莫測恍惚難明體之非有隨用不無隱大無外藏微有餘寂然不動感而遂通包含萬象體不掛一絲頭吾不知其名字之曰全真釋教謂之圓覺又云圓空太上所謂混成又云圓通故南華經云未始有物者至矣盡矣不可以加矣此之謂歟

道藏輯要

析疑指迷論

二奎集四

或問曰何謂心性答曰夫心性之義譬猶漚水水本至清有感漚起風浪渾濁不能鑑理風浪息時水澄漚止以此論之水卽是漚漚卽是水由是言之心卽性用性卽心體體用俱忘全真而已

或問曰何謂性命對曰夫性命之理乃陰陽神氣之異名也夫神氣二字呼喚無窮今略言其大概或謂動靜龍虎水火坎離東西南北春秋溫涼冬夏寒暑否泰窮通升降往來有無虛實上下浮沉高低深淺金木剛柔天地日月震兌昏明夫婦嬰姪金翁黃婆絳雪玄霜紫芽紅粉真鉛真汞其他殊名異呼不可窮極種種名相不可著止總名神氣而已夫欲全神養氣當明